


Biografía di Aura Maybelline Arends Croes (Maybe)

Aura Maybelline Croes a nace na Aruba dia 27 di maart 1945. Door cu e ta traha hopi na scol nan ta yam'e Maybe. Number di su mama ta Aura Croes y su tata ta Frans Antonio Croes. Maybelline ta nieta di Mo Tito Croes kende tabata un di e pioneronan cu a toca musica folklorico. E tabata toca fio. Maybelline a nace y biba e prome dos añanan na Santa Cruz y despues su mayornan a muda bin biba na Playa prome den Wilhelminastraat y despues den Adriaan Lacle Boulevard. Mas despues cu Maybelline a casa, el a biba na Ponton pa despues bolbe bay na Playa. Te ainda e ta biba feliz y contento na Playa. Nan ta seis ruman di cual un a fayece na oktober 2016. Maybelline ta e ruman mayor. E otronan ta Sandra, Dennis, Bianca y Ricky. Maybelline ta casa cu Lito Arends. Su number oficial ta Karel y tempo e ta mucha, nan tabata yam'e Carlito. Nan a kita e Carlo y e Lito a keda. Semper tur hende a keda yam'e Lito. Su fecha di nacemento ta 28 di december 1945. E pareha aki a casa dia 14 di oktober 1970. Maybelline tin 3 yiu, pero 2 ta na bida. E nombrenan ta Carl Anthony kende a nace dia 2 di november 1972 (dfm), Igor kende a nace dia 28 di januari 1975 y Jaira kende a nace dia 22 di februari 1978. Tata di Maybelline ta musico, mientras su mama semper a gusta canta y balia, pero e no a siña toca instrument, pasobra prome aya, un mucha muhe no ta bin mucho na remarca pa mag di siña un instrument y pa bay les. Pero semper el a gusta canta.



Pa Maybelline e bida artistico a nifica trabou, hobby y su pasion

No tin algo cu Maybelline no ta haci cu ta draai rond di musica.

Pa Maybe, musica tabata su trabou, su hobby y su pasion. No tin algo cu Maybelline no ta haci cu ta draai rond di musica. E ta expresa su gratitud na su mayornan, cu a permitie pa e bay studia musica. Pasobra prome aya, y te ainda tin hopi mayor ta puntra e yiu, si e no tin otro cos di bay studia, fuera di musica? Bo no por gana bo pan di cada dia cune. Pero den su caso, su tata y mama ningun rato so a

duda. Nan a haya bon cu Maybelline tabata liber pa pensa y nan a bisa cu si ta esey e ta gusta, nan ta apoy'e y nan a permitie bay studia como docente di musica. Maybelline ta agradecido cu e libertad ey y e ta agradecido cu e ta casa cu un homber cu comprension, hopi pasenshi cu ta dun'e tur e libertad y apoyo pa e por traha cu tur su gruponan y cu tur su muchanan pa duna les. Lito conoce

mayoria di esnan cu ta canta cu ne. E cu Maybe ta busca nan pa ensayo, despues bolbe hiba cas. Asina e ta yuda den tur cos. Si Maybelline no tabatin su yudansa y si e no a permiti pa ta presente na tur ensayo, pa bay na areglista of den studio cu otro hende, e no por a logra nada. Maybelline ta masha agradecido tambe na e cooperacion y yudansa di su yiunan.

Mayornan a haya bon cu Maybelline ta liber pa pensa

Casa cu un homber cu comprension y hopi pasenshi

E bida artistico

Maybe a lanta semper den musica. Anto di chikito ora e ta wak e grandinan ta toca, e ta bati sea cualkier instrument cu tin, manera un maraca of clabio. Di biaha bo ta siña pa keda den compas (maat). Maybelline ta wak e meneer con e tabata toca e cuatro. Anto ta 4 cuerde so e tin. Pasobra e guitarra tin 6. Bo mes sa, bo ta mucha di 8 aña anto su tata a cumpra un cuatro p'e. Na cas e ta purba corda con e meneer tabata pone su dedenan. Maybelline ta coy e sla, despues e tabata bay riba diadomingo cu su cuatro y e tambe tabata purba toca. Su mayornan tabatin un acoustic piano na cas esun preto y halto.

Nan a ripara cu tur ora Maybelline tawata bay na e piano y e mes ta purba saca melodia. Nan a pensa cu ta bon pa manda Maybelline les. Su prome les di piano tabata for di Sra. Rhoda Steenhuizen kende a dun'e les di canto tambe. E base pa canto y solfeo y pa toca piano bon, mientras e tabata lesa noot, a pone cu su mayornan a dicidi pa manda Maybelline scol di musica. Dus Arubaanse Muziekschool tawata existi caba e tempo aya, pero bou direccion di e maestronan macamba. Anto ey, Maybelline a sigui cu e lesnan di piano y cada bes su interes tabata crece mas y mas.

Maybelline di chikito ora e ta wak e grandinan ta toca, e ta bati sea cualkier instrument cu tin, manera un maraca of clabio.

Dedicacion Musical

Na Hulanda asina les cuminsa te ora e caba, ta studia bo ta studia. Dus semper bo tawata studia bo instrumento individual, anto ey Maybelline a siña toca guitarra tambe, pasobra cu un guitarra ta mas facil pa move ora di duna les. E tempo aya, no tabatin e pianonan portatil cu facilmente bo ta carga na man, manera awendia. Pues, e ora Maybelline a dicidi pa e cana rond den klas, duna les cu un guitarra tambe ta leuk, pasobra ya e tabata mors cu e cuatro, pero toch el a siña e base un tiki pa e por toca akkoord. No cu e por toca melodia (pica), pero e ta toca akkoord riba guitarra. Esey Maybelline a siña na Hulanda.



Maybelline, cu su guitarra y koor

Pa e lesnan di teoria, nan tabata forma grupo di dos, tres estudiante, anto nan tabata ensaya nan solfeo hunto. Pero cosnan individual, manera guitarra, piano y canto bo ta ensaya bo so na cas. Den lesnan di piano, bo ta haya tur tecnica, tur e tono- y etudesnan pa bo ensaya bo scalanan.

Tambe bo ta haya hopi tecnica pa bo ensaya un cantica of pa bo toca un sonata chikito cu ta bin despues. Ta importante pa bo sa bo scalanan bon y pa bo etudes ta bon practica. Den canto bo ta siña yen di tecnica con pa uza bo rosea, siña uza bo resonancia y articulacion. Ta hopi practica pa bo ensaya y no

ta djis canta bo ta canta. Kisas 20 minuut di e ora ta bay na ensayo di teoria y tecnica, anto 10 minuut na e instrument of canto mes. Ora bo ta studia bo ta haya hopi musica clasico, pero Maybelline tabata gusta, pasobra su tata semper tabatin den su coleccion di disco na cas, hopi musica clasico y semi clasico. Maybelline tabata gusta scucha musica suave, musica instrumental. Dus e ora e cambio pa bay Hulanda, bay studia musica tabata hopi facil. E cambio a resulta agradabel y Maybelline ta contento, pasobra ta e musica clasico ta e base pa tur sorto di genero musical.



Maybelline na Piano

Participacion den gruponan musical

Maybelline tabata miembro di Arubaanse Kunst Kring (Circulo Arubano di Arte), dia el a bin bek Aruba pa duna les na Arubaanse muziekschool, awendia Scol di Musica Rufó Wever. Ora bo haya un beca, nan ta pidi en todo caso pa bo bay traha bek na e pais unda bo a nace. Door di esey Maybelline di mes kier a bin traha na Aruba. E tabata bay cada dia na un scol di un otro distrito pa duna les. Maybelline a haya permiso pa e por a duna amv (algemene muzikale vorming) na e

scolnan basico. Maybelline a haci mas tanto presentacion cu su koornan. Na comienso, ta su so cu e guitarra pa compañía e grupo, pasobra no ta tur ora bo ta haya banda toca pa bo. Pero tin biaha e tabatin e suerte pa haya un grupo ta yud'e cu guitarra, piano etc. Tin biaha nan ta toca cuatro, otro ta bati maraca. Maybelline tabatin asina hopi grupo, entre otro Sunrise, Young Voices, Coro Tutti Frutti, Coro di Misa San Francisco y awendia Maybelline tin Melange y ainda e tin Tutti Frutti.



E parti internacional

Maybelline a bay cu su muchanan, sea nan ta canta solo of den grupo, na Venezuela, Corsou, Boneiro y Republica Dominicana. Tambe nan a bay presenta den show De las Doce cu tabata masha leuk mes.

Activo den diferente organisacion

Maybelline tabata hopi activo, como miembro di diferente organisacion, manera di UNOCA y di Kunstkring. Maybelline ta yuda hopi na Biblioteca Nacional y na Departamento di Cultura. Pues tin hopi trabou riba tereno di cultura musical.

Participacion na festivalnan

Maybelline por bisa a participa na casi tur festival di canto cu tabatin. E tabata participa cu su muchanan door cu tur e ta duna les. Su muchanan tabata participa den Festival Hubenil, Festival di Oro, Festival voz Supremo, Festival di OTI, Festival Voz i Landia, Festival di Tumberito y Festival di Merengue pa mucha.

Sugerencia pa futuro generacion

Maybelline tin un preocupacion, pasobra el a traha 40 aña na Academia Pedagogico cu hopi amor. Ora e tabata ey, e studiantenan tabata yen di dedicacion y cu hopi inspiracion pa bay duna les. Pa haci guia practico, bo ta bay weita con nan ta duna les y tur cos tabata bay hopi bon. Pa un of otro motibo ora cu e studiantenan caba di slaag, nan ta bay traha como docente di scol basico y bo no ta tende cu musica of e otro disciplinanan di arte ta florece. Pa colmo, awendia hasta bo ta ripara cu nan no ta haya ni cantamento na scol, corda musica. E materia musica, ta encera mas cu cantamento so, pasobra e ora bo tin henter e formacion di musica, pues bo por haci diferente cos. No tin ni esey. Maybelline ta puntra su mes kico ta pasando? Dicon no por ta, cu na scolnan, mescos cu ta haya taal, rekenen, geschiedenis y aardrijkskunde, tambe e materianan expresivo, cu ta gymnastiek, musica y tekenen por haya e mesun balor cerca tur docente y tur cabesante di scol. Tur hende sa cu pa bo desaroya como un persona balansa, bo mester no solamente di e conocimiento di e materianan manera idioma, aritmetica, etc., pero bo mester tambe di e otro parti di e creatividad den bo sesonan. Anto ta hopi importante pa berdaderamente nos stimula educacion riba tur tereno na scol, pasobra ta ey nos muchanan ta prepara nan futuro pa asina nan ta un hende avansa y util den comunidad. Y ta den nan desaroyo general, nan mester haya tur e disciplina ey. Tanto conocimiento di cultura, deporte como ciencia, ta esencial pa e ser humano por gosa a lo largo di un nivel di bida halto cu hopi placer y pa e por sigui duna un aporte di balor grandi den comunidad.